

افتوني...!!

الست الطيبه..

حلمها بسيط وصادق
لا هو اللي عادم
ولا هو اللي حادق
تطلب علي قد عرقك
وعملك الكادح
تفطر هي بالبايت
وتقدمك الصابح
الست الطيبه
ست الفجر وست الدين
تداري على رغيفك
لو غموزه طين
تجري علي حصيرك
وكل همها تلمها
تخاف لحد يجيلك
يكشف لقمتك لو شمها
وانتا بتعافر
عايز تسعدها ويبقالك صيت
ترتاح من الشقى واللوصه وترفع البيت
وتمسك عصايه موسي
وتبقي خولي
تغير لها الخلخال وتجيب لها اللولي
وهيا راض

افتوني...!!

وعارفه كفك مخروم
يادوب يزقيها
ويرجع تاني يعوم
وراضيه
وبتحمده علي الشبع والجوع
ياك فاكرها طير في النجوع
مفجوع
ده كفك المخروم
بالنسبه ليها بير
تشرّب ويفيض يغسل هدومك م الجير
ماشيه في طريقك تتني الشوك في لحمها
رغم كل الطرق جنبها بتطرح عبير
مين ده اللي يهينك
ياست الصبر يامرمر
يا بوابه دارنا يتقل مقدارنا لو تقصر
يا ستره اللقمه
ورقعاه الهدمه الدايبه
وحصاله سر شايله احلامنا الشايبه
بتقلبي كابوس الليل
في الشتا جنه
وتنقشي عرق ادينا
بعد الشقا حنه
اتباهي
انتا السيدة

افتوني !!

وتعبر لو تسيد
وقت العوزه
ارضك صيد
وانتي الحصيد
بتطرحي خير
في سنين الدميره
انتي الدليل
في التووه والحيره
برمي كل الحمول علي ضهرك
وسرح
اسبلك فتافيت
من يدك يفيض القليل
ويطرح
يجرح كل معزوز راقد علي
الخير
لما يفوح نهرك في حر ضهرك
ويسير
اشوفك من ضي العرق علي جبيني
بيصب
تنزلي في عيوني مالح لائنك
عذب
اداعبك ورميكي بكفي علي
الارض
وتيمم بطوبك ومسح في توبك ونشره علي الورد
وفجاء

افتوني...!!

يتقلب الحال
لما حال
بيننا موج البعاد
هشد خلاص الرحال
وسافر للجهاد
ايوه كلمني الكفيل
وفهني قطع الرطب
قلتلوا لو هشيل حجاره
واجمع في ليلي حطب
بنالي اوضه
سقفها جريد
وفهمني القانون
فضلت اسمعه وناري بتقيد
كأني كانون
وقلي كلام كتير وداريته
لو كنت عريته
كانت بانت حروفه جنون
لا امتي هفضل هارب عنك يابلا دي
ومعقوط
سنين شاربين الهاري عشان
القوت
زرعنا وفلح الزرع
ولما طرح الفرع
كان المفروض
في الشرع ناكل توت

افتوني...!!

ان جيتك وفاتح حنكي من الجوع
علي ايه بتورمي الضلوع
بضرب البوت
وانتي قادره
ونادره كام ندر
تأمني خوفا
وتحطي علي كفوفي البدر
وتزرعي علي رفوفي
بذره شبع ودفي
وتقومي اللي اتكفي وتسلميه نبوت
البوص لما اتنى
ملقتش غير الهبوط
ورجعنا لما جعنا في بلاد الغريب
لقيتك غله
والحله اللي سيبها بتغلي ميه
رجعت تطيب
وانتي راشه الطيب
وفارشه سجادك لاستقبالي
انا اسف كان في بالي
جنه حبيب

افتوني...!!



وانتي قبالي ورد الجنائن
كأني غريب
انا اصلا مستغرب على حالك
اناسايك نهار منهار
بيغرب لليل حالك
رابط بأيدي طحينك بخيط
شالك
مكنتيش حتي لقمه
في زيت
ونخلك شايع نهز فيه
ومهما هزيت
بيلوح صيت
وتمره في بيت سلاطينك

